

مراد ناجح عزيز

السماسرحانهفشعرها

شعر

مراد ناجح عزيز



42

تعنى بنشرالأعمال الإبداعية لبيدعى مصرالمستسحيقين

الأراء الواردة في هذا الكتاب لا تعبر بالضرورة عن توجه الهيئة بل تعبر عن رأي المؤلف وتوجهه في المقام الأول.

حقوق النشر والطباعة محفوظة للهيئة العامة لقصور الثقافة.
 يحظر إعادة النشر أو النسخ أو الاقتباس بأية صورة إلا بإذن
 كتابى من الهيئة العامة لقصور الثقافة. أو بالإشارة إلى المصدر.

سلسلهٔ حــروف

تصلرها الهيئة العامة لقصور الثقافة

رئيس مجلس الإدارة
د.سيد خيطاب
امين عام النشر
محمد أبو المجد
مدير عام النشر
ابتهال العسلي
الإشراف الفني
د. خياليد سيرور

- السما سرحانه ف شعرها
 - ه مراد ناجح عزيز
- الطبعة الأولى:
 الهيئة العامة لقصور الثقافة
 القاهرة 2014م
 - ه تصميم الفلاف:

د. ځالل سرور

- الإعداد الفني، وحدة التجهيزات
 - ه رقم الإيداع: ٢٠١٤/ ٢٠١٤
- الترقيم الدولي، 8-908-8 [77-778-978]
 - الراسلات:

باسم / مدير التحرير على العنوان التالى ، 16 شارع أمين سسامي - قسمسر السعسيسني القاهرة - رقم بريدى 1561 ت ، ا2794789 (داخلى ، 180)

> الطباعة والتنفيذ ،
> شركة الأمل للطباعة والنشر ټ، 23904096

السماسرحانهفشعرها

إهــــداء

إليهم جميعا.. أبي وأمي إخوني زوجتي .. صديقة وحبيبه أصدقائي

روحك ماليه البراويز

إلى روح أبي في غيابه الطويـ...ل

كان طيب وبعد غيبه تقوله واحشني قوم يعيط وياخدك على طول بالحضن ويغير الموضوع.. ويغير الموضوع.. (أخبارك إيه، ولسه شديد زي ما انت، والشعرتين تلاته البيض دول ما تشغلش بالك بيهم ...)

ياااااه روحك يا ابويا ماليه البراويز ويتنزل تتمشي حوالينا وتنامع الكنبه وتشرب شاي ويعدين تغيب وأنا نفسي أقولك واحشني بس خايف أعيط وملاقيش. اللي ياخدني بالحضن زيك ويغير الموضوع

قسوى	خفيف
= *	_

خفيف قوي وبيتحرك بشكل مش متعوّد عليه ومافيش حاجه بتمنعه كل الحاجات التقيله اتخلص منها وخصوصًا قلبه المليان ومعبي هموم دلوقت بس يقدر يطير وما يمشيشع الأرض اللي ياما نغصت عليه حياته وعلى قد مازرع فيها.. لا برتقانها مد إيديه وقطف ولا عنبها ضلل يوم علي شباكه

دلوقت بس يقدر يسافر لأي مكان

ويرجع بالزمن حبتين ورا
ويموت ف العسليّه
والبطاطا
وهو مشبّك ف ديل جلابية أبوه
وماكانش لسه الطريق اتملا حفر
وماكانش لسه فيه حاجه توجع
ومالهاش دوا
دلوقت بس يقدر يحقق أحلامه البسيطه..

ويقع كام قتيل منهم
ويتجوز البنت اللي كان نفسه فيها
ويكتب قصيده جديده
يضرب بيها الحزن على قفاه
ويقوله روّح (أمك ف العش واللا طارت)
دلوقت بس يقدر يقول أنا كنت عايش
ومش مهم بقي لو حد صحّاه
ولسه الأيام اللي متشعبطه ف رجليه
ومتقلاه

4		
. 11		
التنفيارة	الصيدب	

الصيد بالسنّاره محتاج
صبر طويل..
ممكن يتلف حوالين رقبتك
ويخنقك
تقوم مكسّر السنّاره
ورامي الطّعم ف الميه
ومروّح
شويه وكنت قرّبت تنسي
انت جيت هنا ليه
وان البحر كان آخر صديق

ف الوقت اللي ما تآمنش لحد فيه يحبك مجاني شويه وكنت قربت تلبس قناع البحر وتداري فيه وتحلم.. بالحياه حلوه والناس طيبين وهدوم الوطن الدايبه مش باين منها.. عوراته شويه وكنت خلاااااااص بس انت اللي قطعت الخيط وافتكرت بس إنك محتاج سمكه

ضيّعت وقت كتير

ضيعت وقت كتير ولا هيه جيالك بالحضن اللي تتمناه ولا انت قادر تروح لها..

برجليك..

اللي نسيت زمان المشي لقلوب الحبايب.. قبل ما تهجم على بستانها الجرّافات وما يبقاش..

> ولا ورده تتقطف ولا جناينيه ضيعت وقت كتير

وفضلت تتحمّل..

ضغط نظرتها اللي ف قصايدك..

بتفتح لك بوابات النور / لأوطان..

مش بتتكعبل ف أحزانها السنين
وتموت
ضيّعت وقت كتير
وإنت اللي باقي م الأمل لسّه
وادي الطريق مفتوح..

دوّقها طعم الفرح
روح

واحضنها بالحضن اللي تتمناه..

مصر اللي رجعت بعد غياب طوي.....ل

باغلط واقول حبيبتي

اللي تحتاجه م الفرح ف ساعات يعمله فعل الكتابه ف دقايق وانا بكتب زي اللي محتاج ونس زي الكفيف اللي ما صدق حد يايده يايده ف عز اللي نايم ع الرصيف ف عز البرد ونزل عليه م السما شعاع داية واتلف فيه واتلف فيه

لقى كل التكشيره اللي عليه راحت ومالهاش أثر أنا باكتب علشان ف الغالب بتيجي سيرتك أو يجوز أنا اللي باتلكك واعمل كده ولو مافيش فرصه مناسبه وسط الكلام باغلط واقول حبيبتي باغلط واقول حبيبتي ف أي جمله وبعدين أمسحها

إحساس جميل إنك تحب حد مش محتاج منه حاجه وف كل مناسبه حلوه تفتكره وتقول ياريته كان.. والفرحه تكمل ونلم بعض ف صوره م اللي ما بتتكررش كتير ف وقت..

بس ممكن نهيأله الظروف..

قصيده	تكتب	نازله	الشبيس
_	•	√	U '

حبيبتي زي القمر
وكان بيسرح بيه خيالي زمان
إني ممكن أطوله
رغم إني عارف جناحي مكسور
والمسافه اللي بينا
بتخليني حاسس بريحة شياط
والشمس نازله تكتب قصيده ع الميه
وانا اللي مليتها الكلام

زي بنت ف کي جي 2 شايله الفرح على كتافها ووإخداك بالحضن ساعتها.. ماتحسش بأحلامك بتنهج جواك وروحك عجوزه وسنين عمرك فرط رمّان ع الأرض كل اللي ماشي يدوس عليه بخطوه ناشفه وقلب قاطع وريد البراءه من جدوره لا ميّل ولم ولاحس بغلطته وبص وراه

حبيبتي زي الندى ع الشجر

قلبه دابيمًا مليان حياااااه

دور ف قصسه وهمیّه

الوقت الجو المكان كل شيء كان تحت السيطره كل شيء كان تحت السيطره خد قراره وه يطلع من مستودع صمته كلام ومشاعر كان شايلهم ليوم زي ده وبنت زي دي.. (نوره)

البنت اللي تملك شوية حنان يصفي غربة سنين عمرك في لحظه

جملتين هـ يقولهم لها وكل ظنّه ..

ه تدوب كل الفوارق الطبقيّه بين الغني والفقير أهه..

بيظبُط نفسه وه بتسامه عريضه على وشه ابتسامه عريضه على أمل إنها تخفف شيء من حرارة اللقاء

وفجأه ..

بيتقطع المشهد

وبيطلع نهار من جوّه ليل

كان مستني ليله زي دي

وحلم زي ده ..

كان فيه واد واخدها جد

وحزين بجد

مع إنه كان بيمثل دور

ف قصّه وهميّه

اللي طلع السما حواديت

اللي صحّاني م النوم النهارده مش أمي اللي صحّاني عبد الحليم بيعني (تخونوه..) فافتكرت إنه.. فافتكرت إنه.. مش أنا بس اللي كتب جوابات واحطها تحت المخدّه علشان لما أحلم بيها وتقابلني علشان لما أحلم بيها وتقابلني

ألاقي كلام أقوله مش أنا بس اللي وقفت التاريخ يوم ما قابلتها علشان يفضل طعم ضحكتها ف كل حاجه مش أنا بس.. مش أنا بس.. اللي طلع السما حواديت ونزلها على جدور رقبته

ما قلتش كالعاده مش فاضي

قابلتها صدفه وشها كان زي الأميره ف حكايات ألف ليله وليله وليله وانا كان نفسي عربيه تخبطني وافقد الذاكره

وما فتكرش حد غيرها والمكان والمزمان اللي جمعنا زي حماده هلال ف فيلم (عيال حبيبه) بصراحه..

أنا باشكر الظروف

اللي خدت رجليه وجابتني لحد هنا وباشكر الخناقه اللي ف أول الشارع رغم إنه فيها دم وانا لا باحب ريحته ولا لونه وباشكر العربيه اللي طرطشت ميه على هدومي ف عز البرد وخلّتني أغير اتجاهي

وباشكر البقال اللي على ناصية شارعنا إنه كان قافل فاضطريت أدور على حد تاني وباشكر أمي إنها ف الوقت ده بالذات طلبت مني أجيب لها حاجه وباشكر إحساسي إني وافقت وسبت اللي ف إيدي وما قلتش كالعاده مش فاضي وباشكر الحلم.. وباشكر الحلم.. وأصدق إني قابلتها صدفه

باتلكُّكُ لسماع لْجَاة

تصدقي

أنا نفسي نبعد شويه

مش عشان حد فینا..

يشوف غلاوة التاني عنده

ويحس بشوق..

مكسر كل حواجز الخوف

والرغبه المهينه ف استمرار حياتنا..

بحر عادم

أنا نفسي نبعد

مش عشان نرجع عيال ف مشاعرنا

ونكتب جوابات بحروف مكسوره

أجمل مافيها كلمة (حبيبي)

ونرسم ورده

ما يقدرش الخريف يسقط ورقها ويسيبها تحت رجلين اللي رايح واللي جاي انا نفسي نبعد

> مش عشان باتلكك لسماع نجاة وهي بتغني.،

(من الشباك وانا خدّي على الشبّاك أنا والشوق وناره الحلوه بستنّاك..) ولما يسمح بينا الزمان ونتلاقي مش هاقولك أي كلام أنا بس هاخدك بالحضن واعيّط على صدرك م الفرحه

عيّل وطاقق ف مخّه حاجات

بروازف صوره والمي ف البرواز.. والصوره اللي ف البرواز.. وانا ماشي فيها وشايل كيس خضار ومروّح.. مخاصمني هم الحياه بس بيغيب ويسلّم واقدر عليه ما يبتش ليله / لو لزم.، أبص ف عيون أمي واتحدّاه.. واتحدّاه..

زي لو يتسخط عصفور

وف طابور المدرسه..

يطلع فوق العلم

متحرر من ضغط الناس والدم

وبداية الزحف المباشر للوجود العسكري

وحساب وعلوم وتاريخ..

هما اليهود دخلوا إزايا؟

ودي سحابه وقفت ف السما فجأه

تميّد

وابتدت تمطر

والدنيا زي عيون غسلها العياط

واتزوقت للحزن

وصعب إنك تقول عليها انتصرت

وانت اللي ف كل حرب معاها

تطلع بعاهه وينكسر لك ضلع وعشمك ف بكره كسرة نفس بتزود هزايمك.. ف سبق الليالي الكسيحه اللي زي ما بتروح زي ما بتيجي غير من شوية صبر ما يوصلوش ميت ف جنازه بارده ف وقت متأخر وانا اللي داخلها عيّل طالع عجوز محني وباداري وشي ف كل وش

خايف طفل أحلامي الجميله يلمحني.. وانا ماشي فيها وشايل ع الكتاف الهم ومروّح.. مخاصمني فرح الحياه مخاصمني فرح الحياه ومش قادر عليه يبات ليله ولا قادر أبص ف عيون أمي

واترجًاه..

خفیف	بنام	4	لسح
₩	•	•	* +

داقت وإنا كنت خلاص قربت أستسلم واسيب لها روحي واعمل بطل إني طلعت منها بهدومي هيه جهرت الملعب والقوانين وانا كنت بطولي باكل طقه واحده ف اليوم وبنام مبسووووط قوي طعم الحياه أجمل وانت راضي وانا قلبي زي النجيل الأخضر والدنيا طول عمرها زي حيطان بيتنا مالياه الشقوق

بس واقف ومتشعبط فينا بحجة العشره القديمه، والعيش والملح ودي حاجات رماها الزمن من حجره بحجة إنه بيحب ينام خفيف وانا لما لقيتها كده واحتار دليلي ملقيتش قدامي غيرك وانت ماكدبتيش خبر زي عادتك بحجّة إني وحشتك وانا ما صدّقت.. بحجة إنها داقت حضنتك.. ورميتها الأحزان ورا ضهري

وشي الصبح ما بيريّحنيش

من بكره
هاقوم الصبح بدري كالعاده
اتوضّي وأصلّي
وهاحاول ما ابصش لوشي كتير ف المرايه
إكمن وشي الصبح ما بيريحنيش
من بكره
هافتح لابويا الدكان
إكمنّه كبر شويه وما عادش يستحمل
وما طلعش من الدنيا بحاجه غيري
غيرشي كمان دخان السجاير
بيحاسبه بأثر رجعى

ومخليه مش قادر ياخد نفسه مرتاح غير كل فين وفين من بكره من بكره هاعمل زي كل الشعرا اللي بجد واسرح ف دنيا من وحي اكتشايخ كل اللي فيها عشاق وبس وه يدخل أبويا عليه فجأه ويقوللي يابني حرام عليك عنيك اعمل لك حاجه تنفعك

هابص ف عيون كل البنات الرايحه والجايه

وأدور عليها..
البنت اللي أنا حبيتها زمان
وسابتني وكبرت فجأه
وأنا لسه بارسم ع الورق..
فانوس
ومريله بكمام طويله للعام الجديد
من بكره بكره إيه اللي انا باحلم بيه
أنا كده على طول في الحلم باخرّف؟

صحيح..

ما انا عمري ما كنت باقوم الصبح بدري

علشان أصلي

ولا عمره كان عندنا دكان

ولا كنت وحيد أبويا وامي ولا حاجه

إنما اللي بجد

البنت اللي انا حبيتها زمان

بس هیه ما سابتنیش

أنا بس اللي ماقدرتش أعمل علشانها حاجه

وفضلت باحلم وبس

وبارسم ع الورق..

السما سرحانه ف شعرها

زي ما انت..

وكل حاجه زي ما انت سبتها..

من يوم ما كبرت وقلت عدولي

الصبح بييجي بعد الليل لسه ..

صوت ميكروفونات الإذاعه

والبياعين

والواقفين ف طابور العيش

وأبونا آدم وأمنا حوا

والبحر مالح

ومروحين للحزن أحلامنا البريئه

زي عيل خايب م الدنيا لسه ما اتعلمش حاجه

وفضل مستني حبيبته سنين لحد ما اتجوزت غيره والقمر له عشاق كتير غيرك والسما سرحانه ف شعرها المفرود ليالي إحساسك الدايم بانتصارات وهميه ف أحلامك..

وحروب ما دخلتهاش رغم إنك بتخاف لتبص لفوق تفتكر إنه طرح السما عالي وإيديك قصيرين لسه وتخاف لتبص لتحت تفتكر إنك مشيت ف الدنيا كتييير ولسه واقف محلك سر..

مافيش وقت

مافيش وقت من عمره واللي فات من عمره مش قد اللي جاي اللي خلاه.. وبدل ما يدور على فرحه تبل ريق عطشه القديم واللي كان مفروض إنه مر عليه وخد براءه يبقى واحد تاني..

كل ليله

بيفتش ف جيوب أيامه..

اللي زاد فيها الرقع من كتر شيل الهموم

على أي حلم

ويفكر ه يقتله إزاي

ويكفنه

علشان لما يجي بكره

ما يدخلش عليه

وإيديه هاضيه

كسائن حسي

حياه
والحياه يعني ناس عايشه
وناس زي ما تكون.
وناس مش.
ومش يعني جبنه قديمه
وكل قديم وله ماضي
بيحن له ساعات
وساعات.
تقل الهموم ع الكتاف بيغير الموجه
ويخليك.

إنت اللي فرحان تبدأ تلم ف ورد بستانك وتكفنه جواك وجواك يعني بير غويط ومالوش قرار يعني ستروغطاع اللي فيه زي البيوت والحلم اللي عاش سهران ف عنيك ليالي وما داقش يوم ابتسامه ولا شاف قمر (وقمر) بنت الجيران اللي ف شارعنا وسايبه روحها للسما..

تقطف نجوم / ترسم وشوش، تكتب حروف بلدي وبلدي يعني الأهرامات والنيل والنيل والناس الطيبه.. والناس الطيبه.. المغرمين بحب الوطن ف أسوأ حالاته بيغنوا غنواته وبيحلموا وبيحلموا والحلم يعني أمل ف بكره بيفتح.. كائن حي اسمه (الحياه)

الحياه بنت شاطره

بالظبط وبالتحديد

کان سنة ۸۸

وما كانش لسه عنكبوت الهموم دخل بينا

واتشعبط على كتافنا

وعشش

وعمل بيوت

وفقس

وعمل عيله

كانت الحياه وقتها..

بنت شاطره ف لعبة الحكايات

ومخبيالنا في كل لعبه / وطن..

نتدارى فيه وقت الهزايم هوً ده مكتب الناظر

على إيدك الشمال وانت داخل..

من حوش المدرسه

واللي كانت فوقينا دي..

صورةالزعيم

واللي بعد كده طلع لا مؤاخذه..

وطلع ضارب الشعب كله على قفاه

بسالغريبه

كل اللي كانوا ف الصوره بيضحكوا

بالظبط وبالتحديد..

أنا مش عارف ليه

بس احتمال إنهم كانوا بيضحكوا..

علشان الصوره تطلع حلوه وبس

	*	.
طاوله	بوليان	عيبا
	O. 1	

لو كنت سألتني كنت هاقولك بحبها وكنت هاقولك كمان باحبها ليه من غير ما تسأل علشان أنا ما باصدق حد يكلمني عنها على طول أعمل م الحبّه قبّه ما تيجي نلعب عشرتين طاوله كمان وكبايتين شاي كل ده علشان القعده تطول وانا أقدر أقول كل اللي نفسي فيه وما اسيبش حاجه

ولوقال تعبت مالقعده

هاقوله يااااه فكرتني دي الوحيده اللي بيبان تعبها ف كل الحاجات الحلوه

يعنى لما تتعب

تلاقي روحها رايحالك

زي برد نشتا

تقلب عليك الغطا لحد اما تلاقيك

وهاتك يا غرام

ومافيش مانع آخر الليل نروّح

وانا طول السكه

بافكر لسه فيه حاجات ناقصه ما قلتهاش

ولسه فيه حاجات ما سألنيش عنها

والحلم ليه والربيع أصحاب..

قاعدين ع القهوه

وكل واحد فيهم نفسه يروّح وياخدها معاه؟

لبه	البحربيضحك
	#+♥ +

* ضحکت (یعني قلبها مال)

•

ضحكت يعني الحياه بقي ليها شكل تاني يعني ممكن نمارس. يعني ممكن نمارس. رياضة القفز بهمومنا التقيله ونروح بعيد يعني ممكن نصطاد عصافير يعني ممكن نصطاد عصافير يق لوحه مرسومه

وتدور عقارب الساعه عكس الاتجاه

ونرجع صغيرين
يعني ممكن يستدرجنا الحب
ف حدوته
نعلق صورع الحيطان
ونكتب قصايد
ونمثل دور عبد الحليم
ف الوساده الخاليه
يعني ممكن يطلع البحر من هدومه
ويضحك
واحنا مش عارفين..
(البحر بيضحك ليه)

^{*} مقطع من أغنية لعمر ودياب

طرطشة ميّه

من مكاني

وباصوب سهامي ف كل اتجاه

طرطشة ميه

مجرد بس تعبير انفعالي

لضغط قديم

لحاجات فات وقتها..

ومارجعش

زي طعم احتلال الفرح لعيون البنات..

العوانس

وانسحاب سفن العطش م الحلق

ف بداية ربيع

زي لما بتحلم كنت..

وبتضرب كل أعداءك / يموتوا وانت ما بتموتش وتروح بروحك الطايره بلاد فيها حد لسه بيعشقك ومستنيك.. من غير مايقفشك الرادار وانت معدي بسرعة خوفك م الأيام الجايه.. ومجرّحه التفاصيل ومضله لكع القد ليل..

زي اللي واقفين ف الكمين..

بيفتشوا جيوبك
ويطلعوا كل القصايد
اللي موصله جلوكوز الحياه لقلبك
وبيضربوك
باسم الملاغيه
وبيدبحوك
باسم المتضحيه
ويبعتروك
باسم المحريه.

طرطشه ف كل اتجاه

مش لاقي حاجه أقولها

مش لاقي حاجه أقولها واضحك على نفسي بكلمتين واصدقهم واقول دي قصيده من واقع افتراضي انا اللي عملته وانا بس اللي أقدر أحافظ عليه وارجع للنيل كرامته واهد ابراج القلعه الحزينه واخلي الدنيا تضحك علشان الصوره تطلع حلوه واحط إيديا ف جيوبي لوقت عوزه.. سلام حقيقي

والناس حبايب واخوات
وبالعشره كل اللي بينا هموم نقدر عليه
ونشيله سوا
وبكره مش جاي على كيف العدا
زي امبارح
وامبارح..
ما كانلوش قلب يحب بغباوه زي
وف الآخر..

تاريخ قديـــم

مش معنى انك ما اتولدتش طير وليك جناحات يبقي انت ماتعرفش معنى الحريه يبقي انت ماتعرفش معنى الحريه وما تقدرش تعيشها.
تنزل لسابع أرض ف عنيها وتطلع لسابع سما تقطف ورد أحلامك وتقدمه هديه لبنتك ف عيد ميلادها التاسع وانت بتدعيلها تكبر وتنور الكوشه فليله.

لمت كل هزايم العمر التعيسه ف صرّه ورميتها ف البحر ومش معنى انك ما مُتش شهيد يبقى انت ما تقولهاش باحبك

وتقول ف دمي..

حنيتها سكر زياده

وضعفك..

تاریخ قدیم عدّت علیه السنین ومدوّنوش کاتب

ومش معنی إنه حد بيندهلك يا (أبو مريم) يبقى انت راحت عليك

وخلاص..

طفل أحلامك الجميله انكسر وكان بيرسم سلم ع الحيط ويطلع ينط السور ويبص ع الدنيا اللي ما شفهاش.. بعيون بريئه ويطرد العفاريت م الأوضه لما يزوم ويعمل أسد ويغني.. لما الحياه تلتزم بكل مواعيدها واللي فجروا النبع يشربوا منه

بیکـدّب نفسه

بيبحلق فيك

شايفك وعارفك وحافظك

حته حته..

قورتك العريضه، لون عنيك،

دمل خفيف تحت دقنك

ودي آخر شعره بيضه ف نص راسك

مالهموم

وجرح غويط من زمان ما اتلمش

الجرح اللي لسه بينقح عليك ألمه

لما بيتجسد

على شاشة حلمك كل ليل ف منام

ويفكرك.، .

بالوهم الكبير اللي استدرجك ف غربه مالهاش لازمه

وحطيت فيها كل رصيد أحلامك الوردي يوم ورا يوم لحد ما خلص

وخلصت

وبقيت مش قادر توري له وشك م الخجل

وإنتراجع

وقفاك يقمر عيش

وبتقراله ف كتاب أعدارك الكتير..

الناس والخوف

والسنين

هو عارف إنت مين بالظبط

بس بیکدّب نفسه

ويبحلق فيك

ما اتفرّقناش عن بعض

بالرغم من..

شكلنا اللي مش واحد

ولون عنينا وملامحنا اللي..

مش واحد

ونبرة الصوت

مش هيّه نفس النبره

وما عشناش ف حلم وكنا فيه..

أصحاب

وانا ساقط إعداديه

وهو أستاذ جامعي..

بيحب عبد الحليم ونجاة

وانا باموت ف الكنافه الشعر

بالرغم من كل ده
وحاجات تانيه كتير ما احناش..
زي بعض فيها
ما اتفرقناش عن بعض خالص
ونقول ف الحب كلام م القلب
ونعاهد
ونخاف م الموت بعيد عنها
ونموت ف حبها..

شبه كل البنات

بنت..

تشبه لكل البنات

يعني مش ف السحر جنيه

ولا هيه جايه من بلاد تركب الأفيال

وما بين يوم ليله لقيت نفسك بتحبها

ولقيت ف عنيها نيل

طالع على كتاف التاريخ ومدلدل رجليه

بس ممكن تطلعلك ف قصيده

من بين السطور

بفيونكه حمرا

ومريله

وممكن تلاقيها..

بنت الجيران اللي قصادكم حاطه عنيها ف كشكول المحاضرات بس سايبه روحها متشعبطه فيك مستنياك لما تنزل الشارع وتحلّف عنيك ما يبصّوش لحد غيرها ومايطلعوش ف مظاهره فيها حد بيضرب خرطوش واللي بيجري ف عروقه ميّه بنت..

فيها من كل البنات أحلى ما فيهم ومن البحر حضنه الكبير ومن الطير حنيته ومن الطير حنيته وتبص ف عنيك تقراك وتبص ف عنيها تعيد اكتشاف الفرح والوطن اللي غاااااب

كده	_ط	الظيــــ	
			- (

ما كانش مصدق
إن الليله دي خلصت كده
ونام وقام
وكل شيء مطرحه
لا جرح كان ولا خربشه
دي إيده ودي رجله
ودي عنيه اللي شايفه الدنيا
الدنيا اللي دخلها عريان وحافي
وه يطلع منها.
دي أوضته القديمه ف بيتهم القديم
ودول شوية هم قديم

بيغيب ويلح عليه ف يسيب له البيت والشارع ويروحعالقهوه القهوه اللي خدت مننا كتير بس ما نسیتناش وهيه بتوزع فناجين الصبر تدينا أكتر ده مكتبه ودي أوراقه ودي آخر جمله ف قصيده ناقصه القصيده اللي كان نفسه حد يسمعها بنفس مشاعره وأحاسيسه ويتفزّل.. في البنت اللي حطت راسها على كتافه ونامت لحد الصبح بالظبط كده هيّه دي وهمّه دول وه وده الواد اللي بتحوم حواليه كوابيس كل ليله وما بتقدرش.. تسقط من عينه دمعه أو تزرع ف قلبه لحظة ضعف ما يحسش فيها بطعم الحياه وإنه لازم يعيش ف تسيبه..

المخرج	إذن	بعد
--------	-----	-----

باحبك

أنا لسه ما اتغيرتش

حتى شوقے..

أنا لسه بتسخب على أوضتي

ف نص الليل

واعزم عنيك على سهره صباحي

وفيلم جديد / النهارده..

(حبيبي دائمًا)

وكالعاده

ف نص الفيلم بنستأذن المخرج

ونبذل الأدوار

"نور الشريف وبوسي " هيقعدوا مطرحنا

ونقوم احنا بنفس الدور باحبك

مش مضطرولا مجرد شفقه

علشان هو ده الإحساس اللي خلاني..

أحب الدنيا

وانسى هيّه عملت فيّه إيه

وقبل ما تهزمنا الحياه وتدينا ضهرها

هاخدك ونجري

ونسيب النهايه الحزينه لصحابها

وكالعاده برضه..

هاقفل التليفزيون واستنى عنيك بكره وفيلم جديد..

بيطرقع صوابع جدّه

۲۳ ینایر.. بالنسبه لأي حد غيري ولا حاجه يعني مش هوّه ده اليوم.. اللي هتزيد فيه معدلات النمو وتقل معدلات البطاله في العالم. وكل مظلوم ه ياخد حقه من الحياه تالت ومتلّت ويبطل يسهر طول الليل برّه علشان يكونوا العيال ناموا وماحدش يسأله عن حاجه كان نفسه فيها ومستني يرجع جايبها معاه إنما بالنسبه لي..

٢٣ يناير.. فرصه مناسبه جدا لابتزاز التاريخ اللي وقف بقطر السعاده هنااااك وسابني.. طفل صغير.. كان بيطرقع صوابع جده ومركز قوي ف حكاية الصياد والعصفور المُغني

هو المرايه اللي باشوف فيها نفسي واني لسّه باحب الحياه والشعر والشعر ولما باسمع غنوة (أهل الهوي) لورده لسّه باعيّط ما اعرفش ليه ولسّه أمي حنينه وقلبها جناين خضره ولسّه باقرا ف عنيها (كل سنه وانت طيّب) قبل أي حد تاني

لآخرما يوصل براح الكمنجه

ف الوقت ده

والوقت ده بالذات

حسّيت وكإنه واحد حط إيديه ف جيوبي

وسرقني.. أخد مني حاجه

بس هيه إيه ١٤

مش عارف

وأنا أبويا مالوش فالغنا

لكنك تحس ف كلامه حنين

يشدك لآخر ما يوصل براح الكمنجه..

ف بداية مرور التعب

والعساكر

والبنت..

اللي اجتل آخر نظراتي
اللي احتل آخر نظراتي
قبل ما أدخل كتاب الأحياء
تحاربني الأميبا
وداروين.
(الإنسان أصله قرد)
ولما سقف الأوضه يطبق عليه
أموت أكتر ف نسمة هوا
ودُش بارد
يوطّي ضغط الدم

زي اللي تاه ف البنج

زي ما انا شايف بتضحك بس اللي انا مش شايفه بتضحك على إيه ولمين إكمنه ده مش وقته خالص ولا له دليل أكيد فيه شيء مدغدغ مشاعرك بشكل هستيري خلاك مش قادر تميز.. بين الفرح والحزن

زي اللي تاه ف البنج بيخرّف لا كان قدامه بحر ولا ف صحرا ويقول.. (عطشان وبكره زي إمبارح وإمبارح ماكنش صاحب كرامات وأبوك السقا مات..) واتبعترت جنه ف غرام.. وقتنا الحالي الوقت اللي استكان للألم واتعود على جلاده وخلاك بدل الدموع تضحك

قليّل زي عصفور

ادُورت واخده ف وشها وماشیه وحاطه إدیها علی قلبها..

• •

أول شهود الصبرع الغربه واللي طلعت بيه م الدنيا بتسحّب على طراطيف صوابعي على طراطيف صوابعي الصاحب اللي عمره ما خان والحبيب اللي دايما بازعًله وكان يسابق ويصالحني ويوزع بنبونيع المعازيم ويزوق الكوشه رغم إنه الفرح مش ليه طعم الربيع..

اللي انا باستناه م السنه للسنه المنه المن

اللي بحجم أحلامي العجوزه وقليل زي عصفور وف أصغر عش ف شجرة مودّه يبات

وياكلها بملح لو ضاقت وكل العيال ف الشارع تعرفه وكان وقت اللزوم يلعب معاهم ويرسم بالألوان شخابيط ويكتب ع اللوحه. (وطن) دلوقت بس عرفت أنا ليه.. كانت حاطه إديها على قلبها.. والليل عقارب سوده بتحوم حواليه..

حل سلمي

عنها

ورحت واخد

ديل الجلابيه ف سناني وماشي

فقير دقه

واللقمه بطعم المرتتغمس

وأدينا عايشين

ومطرح ما تحط راسك حط رجليك

ونام

واحلم

وماتسيبهاش ورده تدبل ف إيديها روحك

وده حل سلمي

يدوبك

ه يوطي ضغط الدم

وصوت الأغاني الهابطه
يعني مافيش داعي للشيشه
والمرواح بدري
أهه منه سفر
ومنه محاوله لفتح حوار ف مسلسل حزني اليومي
اللي ما بيخلصش
إكمنه بيقطع إرساله كتير
قبل نهايته الحتميه
اللي ه يموت فيها البطل
أو يعيش عاجز

وتسيبه حبيبته ف نص الطريق لا صحاب ولا حبايب ولا وطن اسمه ضهر أتسند عليه وينِخَ ف أول أزمه وده حل سلمي يدوبك ه يعلي ضغط الدم وضغط الهم وضغط الخوف وضغط الخوف وضغط.

يعني ما فيش داعي للقصيده

5
روحك ماليه البراويز
خفيف قوي11
الصيد بالسنّاره17
ضيّعت وقت كتير21
باغلط واقول حبيبتيي
الشمس نازله تكتب قصيده أ
دور ف قصــّه وهميّه
اللي طلع السما حواديت41
ما قلتش كالعاده مش فاضي45
باتلكُك لسماع نجاة
عيّل وطاقق ف مخّه حاجات55
بيحب ينام خفيف 61

وشي الصبح ما بيريّحنيش 65
السما سرحانه ف شعرها17
مافيش وقتوقت
كائن حي
الحياه بنت شاطره
عشرتين طاوله
البحر بيضحك ليه
طرطشة ميه
مش لاقي حاجه أقولها103
تاريخ قديــم
بیکدَب نفسه
ما اتفرّقناش عن بعض
شبه كل البنات
بالظبيط كده
بعد إذن المخرج
بيطرقع صوابع جدّه
لآخر ما يوصل براح الكمنجهلآخر ما يوصل براح الكمنجه
زي اللي تاه ف البنج
قليّل زي عصفور
حل سلميعلى على المامي

ضيعت وقت كتير ولاهيه جيالك بالحضن اللي تتمناه ولاهيه جيالك بالحضن اللي تتمناه اللي نسيت زمان المشي لقلوب الحبايب. فبل ما تهجم علي بستانها الجرّافات ضيعت وقت كتير، وفضلت تتحمل. ضغط نظرتها اللي ف قصايدك. بتفتح لك بوابات النور / لأوطان. بتتكعبل ف أحزانها السنين وتموت ضيعت وقت كتير، وانت اللي باقي م الأمل لسه وادي الطريق مفتوح. دوقها طعم الفرح وحسنها بالحضن اللي تتمناه. وحسنها بالحضن اللي تتمناه.





